



Sumáriu Kazu
Tribunál Judisiál Primeira Instáncia Suai
Juñu 2023

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Judisiál Primeira Instáncia Suai.

1. Totál kazu ne'ebé JSMP monitoriza :27

Artigu	Tipu Kazu	Númeru
Artigu 145 Kódigu Penál (KP), no artigu 2,3, 35 no 36 Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	18
Artigu 177 KP no artigu 2, 3, 35 (LKVD)	Abuzu seksuál ba menór ho natureza violénsia doméstika	1
Artigu 177 KP	Abuzu seksuál ba menór	1
Artigu 23,24 no 172 KP, artigu 251 KP KP	Tentativa violasaun seksuál no furtu simples	1
Artigu 23, 24 no 172 KP	Tentativa violasaun seksuál	1
Artigu 145 KP konjuga ho artigu 2, 3(a),35 (b) no artigu 36 LKVD no artigu 157 KP no artigu 258 KP	Ofensa ba integridade fízika simples ho natureza violénsia doméstika, ameasa no danu simples	1
Artigu 140 KP	Omisídiu negligente	1
Artigu 171	Koasaun seksuál	1

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77295795

www.jsmp.tl

info@jsmp.minihub.org

Facebook: www.facebook.com/timorleste.jsmp

Twitter: @JSMPtl

Artigu 316 KP	Kontra bandu	1
Artigu 258 KP	Danu simples	1
Totál		27

2. Totál desizaun ne'ebé JSMP monitoriza:19

Tipu pena	Artigu	Númeru
Suspensaun ba prizaun nia ezekusaun	Artigu 68 KP	14
Pena multa	Artigu 76 KP	2
Omologa pedidu dezisténsia keixa	Artigu 262 KPP	1
Absolve		2
Totál		19

3. Total kazu sira ne'ebé adia tuir JSMP nia monitorizasaun:0

4. Totál kazu sira ne'ebé sei kontinua prosesu tuir JSMP nia monitorizasaun : 8
B. Deskrisaun ba sumáriu kazu ba desizaun sira.

1. Krime ofensa ba integridade fízika simples ho natureza violénsia domestika

Nú. Prosesu : 0023/ 22. BBMLV
 Kompozisaun Tribunál : Singulár
 Juis : Dr. Samuel da Costa Pacheco
 Prokuradór : Dr. Nelson J. S Magno
 Defeza : Dr. Angelmo Pinto
 Desizaun : Pena prizaun fulan 3 suspende ba tinan 1

Iha 2 Juñu 2023, Tribunál Judisiál Primeira Instánsia Suai liuhusi julgamentu movel iha Munisípiu Bobonaro prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JdSL hasoru nia feen, iha Munisípiu Bobonaro.

Akuzasaun prokuradór

Prokuradór akuza katak iha 12 Marsu 2022, iha oras tuku 20:00 kalan, arguidu foti ai-baku lezada nia ulun, maibé la kona lezada, tanba lezada satan netik ho liman, rezulta lezada nia liman bubu no mean. Antes agresaun ne'e, arguidu ho lezada diskute malu

kona-ba arguidu tama tan lezada iha kioske hodi husu telefone, lezada fó telefone ba arguidu maibé telefone loke ladi'ak tanba uza hela kode, nune'e arguidu kontinua husu telefone ne'e ninia kode, maibé lezada la fó hatene, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarara katak arrepende nia hahalok no promete sei la komete tan krime hanesan iha futuru no foin primeiravés mai hatan iha tribunál.

Depoisde rona deklarasaun arguidu nian, prokuradór husu ba tribunál atu presinde deklarasaun lezada, tanba arguidu konfesa faktu integralmente. Kona-ba pedidu ne'e, defeza laiha opozisaun. Tribunál bazeia ba pedidu refere, presinde audisaun ba lezada nia deklarasaun.

Alegasaun finál

Prokuradór haktuir katak arguidu provadu komete krime tuir faktu sira iha akuzasaun, prokuradór haree katak krime violénsia doméstika aas tebes nune'e atu halo prevensaun ba krime refere, husu ba tribunál atu kondena arguidu ho pena prizaun suspende ninia ezekusaun.

Entretantu, defeza iha nia alegasaun haktuir katak iha perante julgamentu arguidu konfesa, arrepende nia hahalok no depoisde akontesimentu ne'e arguidu la komete ona krime seluk hasoru lezada. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu sira hotu, tribunál prova katak arguidu foti ai-baku lezada nia ulun, maibé la kona lezada, tanba lezada satan netik ho liman, rezulta lezada nia liman bubu no mean.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

2. Krime ofensa ba integridade fízika simples ho natureza violénsia domestika

Nú. Prosesu	: 0008/22.BBMLV
Kompozisaun Tribunál	: Singulár
Juis	: Dr. Samuel da Costa Pacheco
Prokuradór	: Dr. Nelson J. S Magno
Defeza	: Dr. Angelmo Pinto
Desizaun	: Pena prizaun fulan 6 suspende ba tinan 1

Iha 2 Juñu 2023, Tribunál Judisiál Primeira Instánsia Suai liuhusi julgamentu movel iha Munisípiu Bobonaro prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu RBT hasoru nia feen, iha Munisípiu Bobonaro.

Akuzasaun prokuradór

Prokuradór akuza katak iha 21 Janeiru 2022, iha oras tuku 22:00 kalan, lezada tuur hela iha liur no bainhira tama ba uma laran lori mós ho kadeira tama tau besik loos fatin arguidu toba no kadeira tarutu maka'as, nune'e arguidu hakfodak hodi hirus lezada no lezada hatan katak "*hau iha uma laran ne'e labele ko'alia se ko'alia ona la di'ak.*" Depoisde ne'e lezada tama ba kuartu laran, arguidu lori katana atu taa lezada maibé la konsege tanba lezada hakilar "*hau mate ona,*" nune'e arguidu la konsege taa lezada tanba katana monu husi arguidu nia liman, arguidu kaer lezada nia kanuruk hodi riba kedas lezada ba ai-kabelak leten no kontinua tuku dala tolu iha lezada nia kotuk laran, basa dala haat iha lezada nia hasan parte karuk no loos, rezulta lezada sofre moras iha hasan no kabaas. Kazu ne'e aneksa mós ho relatóriu médiku husi PRADET.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak arrepende nia hahalok no promete sei la komete tan krime hanesan iha futuru no foin primeiravés mai hatan iha tribunál. Depoisde rona deklarasaun arguidu nian, prokuradór husu ba tribunál atu presinde deklarasaun husi lezada, tanba arguidu konfesa faktu integralmente. Kona-ba pedidu ne'e, defeza laiha opozisaun. Tribunál bazeia ba pedidu refere, presinde audisaun ba lezada nia deklarasaun.

Alegasaun finál

Prokuradór haktuir katak arguidu provadu no komete krime hasoru lezada tuir faktu sira iha akuzasaun, prokuradór mós haree katak krime violénsia doméstika aas tebes nune'e atu halo prevensaun ba krime refere, husu ba tribunál atu kondena arguidu ho pena prizaun suspende ninia ezekeusaun.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, arrepende nia hahalok no depoisde akontesimentu arguidu la komete ona krime hasoru lezada.

Desizaun

Depoisde avalia faktu sira hotu, tribunál konsidera faktu hotu provadu bazeia ba konfisaun arguidu nian, Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

3. Krime ofensa ba integridade fízika simples ho natureza violénsia doméstika

Nú. Prosesu : 0020/23.BBMLV
Kompozisaun Tribunál : Singulár
Juis : Dr. Samuel da Costa Pacheco
Prokuradór : Dr. Nelson J. S Magno
Defeza : Dr. Angelmo Pinto
Desizaun : Pena prizaun fulan 3 suspende ba tinan 1

Iha 2 Juñu 2023, Tribunál Judisiál Primeira Instánsia Suai liuhusi julgamentu movel iha Munisípiu Bobonaro prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FG hasoru nia feen, iha Munisípiu Bobonaro.

Akuzasaun prokuradór

Prokuradór akuza katak iha 10 Fevereiru 2023, iha oras tuku 13:00 meiodia, arguidu hit lezada nia ain rua lezada monu ba rai rezulta lezada nia ulun baku iha fatuk halo moras no bubu, arguidu kontinua dulas lezada nia liman sorin karuk hafoin habit lezada nia ulun iha arguidu nia kalilin to'o moras.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu nega faktu hotu iha akuzasaan no deklara katak arguidu la hit lezada nia ain rua halo lezada nia ulun kona fatuk, la habit lezada nia ulun ba iha kalilin, loos maka sira hadau malu osan ne'ebé lezada kumu hela ho liman, arguidu konfesa nia dulas duni lezada nia liman ba kotuk.

Entretantu lezada konfirma faktu hotu iha akuzasaan no deklara katak, depois akontesementu ne'e sira diak malu ona no moris hamutuk hanesan feen ho la'en.

Alegasaun finál

Prokuradór haktuir katak arguidu provadu komete krime tuir faktu sira iha akuzasaan, prokuradór haree katak krime violénsia doméstika aas tebes nune'e atu halo prevensaun ba krime refere, husu ba tribunál atu kondena arguidu ho pena prizaun suspende ninia ezekusaun.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak iha nia alegasaun haktuir katak iha perante julgamentu arguidu deklara la baku lezada, maibé konfesa nia dulas duni lezada nia liman atu hadau malu osan ne'ebe lezada kumu hela.

Desizaun

Depoisde avalia faktu sira hotu, tribunál prova katak arguidu hit lezada nia ain rua lezada monu ba rai rezulta lezada nia ulun baku iha fatuk halo moras no bubu, arguidu kontinua dulas lezada nia liman sorin karuk hafoin habit lezada nia ulun iha arguidu nia kalilin to'o moras.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan tolu suspende ba tinan ida.

4. Krime ofensa ba integridade fízika simples ho natureza violénsia doméstika

Nú. Prosesu : 0061/22.CVSUI
Kompozisaun Tribunál : Singulár
Juis : Dra. Patricia de Araujo F. B. M. Xavier
Prokuradór : Dr. Nelson J. S Magno
Defeza : Dr. Domingos dos Santos
Desizaun : Pena prizaun fulan 2 suspende ba tinan 1

Iha 13 Maiu 2023, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples ho natureza VD ne'ebé envolve arguidu TM hasoru nia feen, iha Munisípiu Covalima.

Akzusaun prokuradór

Prokuradór akuza katak iha 18 Agostu 2022, iha oras tuku 10:00 dadeer, argudu foti ai nato'on hodi baku dala rua iha lezada nia kotuk laran, rezulta moras no bubu. Antes agresaun ne'e, arguidu ho lezada diskute malu kona-ba lezada husu osan ba arguidu atu sosa fós maibé arguidu hatan dehan "faan ó nia aan mak osan ne'e ba sosa fós," ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu deklara katak komete aktu ne'e hasoru lezada, iha momentu ne'eba lezada sai husi uma kalan ida lora ida la tama uma no ba lora rua lezada fila ba sira nia uma, arguidu komete duni aktu ne'e hasoru lezada no depoisde akontesimentu ne'e arguidu ho lezada soe malu ona (*moris sepepa*).

Alende ne'e, lezada kontinua konfirma faktu hotu iha akuzasaun no deklara katak depoisde akontesimentu ne'e moris separa ona ho arguidu.

Alegasaun finál

Prokuradór konsidera arguidu provadu komete krime hasoru lezada, bazeia ba deklarasaun arguidu nian no konfirma mós husi lezada, haree ba krime violénsia doméstika aas tebes, nune'e husu ba tribunál atu kondena arguidu ho pena prizaun.

Enkuantu defeza husu ba tribunál atu kondena arguidu ho pena multa ho konsiderasaun katak arguidu deklarara faktu ne'ebé nia komete no depoisde akontesementu ne'e arguidu ho lezada moris separa ona, nune'e defeza konsidera krime ne'e sei la akontese tan iha futuru.

Desizaun

Depoisde avalia faktu hirak ne'e, argudu foti ai nato'on hodi baku dala rua iha lezada nia kotuk laran, rezulta moras no bubu. Bazeia ba faktu provadu hirak ne'e tribunál konklui prosesu ne'e no kodena arguidu ho pena prizaun fulan rua suspende ba tinan ida.

5. Krime tentativa violasaun seksuál no furtu simples

Nú. Prosesu : 0016/22.CVZML
Kompozisaun Tribunál : Koletivu
Juis : Dr. Naason Mário Armindo Marques Doutel, Dr. Samuel da Costa Pacheco no Dra. Patricia de Araujo F. B. M. Xavier
Prokuradór : Dr. Nelson J.S. Magno
Defeza : Dr. Angelmo Pinto
Desizaun : Absolve

Iha 14 Juñu 2023, Tribunál Judisiál Primeira Instánsia Suai prezide leitura akordaun ba krime tentativa violasaun seksuál no furtu simples ne'ebé envolve arguidu JB hasoru lezada ho idade tinan 16, iha Munisípiu Covalima.

Akuzasaun prokuradór

Prokuradór akuza katak iha 18 Agostu 2022, iha oras tuku 04:30 Madrugada, arguidu loke janela husi kuartu lezada nian haksoit tama ba lezada nia fatin ho falun oin metin. loke lezada nia musketeru no sae ba kama leten no buti iha lezada nia kakorok lezada tebe no hakilar, nune'e lezada nia inan mós hader halai mai entaun arguidu husik hela fatin no halai sai no foti lezada nia telefone ho marka Oppo A10.

Prokuradór akuza arguidu kontra artigu 23, 24, 172 KP kona-ba tentativa violasaun seksuál ho moldura penál tinan 5 too tinan 15 no artigu 251 KP kona-ba furtu simples ho moldura penál tinan 3 ka multa.

Produsaun ba prova sira

Antes tama ba produsaun ba prova bazeia ba artigu 262 KPP kona-ba tentativa ba konsiliaun tribunál halo tentativa ba krime furtu simples, iha tentativa konsiliaun lezada deklarara katak antes ne'e sira dame malu ona no arguidu fó fila tiha ona lezada nia telefone nune'e lezada hakarak dexiste tiha keixa ne'e, alende ne'e arguidu mós konkorda no simu lezada nia dexisténsia, nune'e prokuradór no defeza husu atu omologa prosesu ne'e no kontinua julgamentu ba kazu tentativa violasaun seksuál.

Iha julgamentu, arguidu deklarara katak faktu sira loos hotu, maibé kona-ba buti lezada nia hirus matan ne'e arguidu la buti. Arguidu deklarara tan katak momentu ne'e arguidu lanu todan nune'e halo saida mós arguidu lahatene aan.

Alende ne'e lezada mós deklara katak iha akontesementu ne'e arguidu tama husi janela no sae ba kama leten atu buti kakorok, maibé lezada tebe aguidu nia hirus matan no hakilar husu ajuda ba ninia inan aman, arguidu haksoit husi kama leten foti telefone halai sai.

Alegasaun finál

Prokuradór haktuir katak, arguidu deklara katak tama duni lezada nia kuartu no tenta atu buti nune'e lezada tebe arguidu no lezada mós haktuir katak la konsegue kaer lezada ninia orgaun sensitivu, nune'e pokuradór husu ba tribunál atu aplika pena ne'ebé adekuadu ba arguidu.

Enkuantu defeza husu ba tribunál atu absolve arguidu husi krime ne'e, ho konsiderasaun katak, arguidu tama duni ba lezada nia kuartu maibé la kaer lezada nia orgaun sensitivu no lezada mós konfirma ho arguidu nia deklarasaun katak arguidu tama duni husi janela, maibé lakonsege kaer lezada ninia orgaun sensitivu.

Desizaun

Depoisde avalia faktu hotu, tribunál konsidera faktu hotu la provadu, tanba arguidu foin tama ba lezada nia kuartu, lezada tebe kedas arguidu no husu ajuda, maibé arguidu halai sai, nune'e tribunál konsidera faktu iha akuzasaun la provadu hotu, nune'e tribunál konklui prosesu ne'e no absolve arguidu husi krime ne'e.

6. Krime danu simples

Nú.Prosesu	: 0006/22.CVSUI
KompozisaunTribunál	: Singulár
Juis	: Dr. Naason Mário Armindo Marques Doutel
Prokuradór	: Dr. Rafael Jeronimo Gusmão
Defeza	: Dr. Domingos dos Santos
Desizaun	: Omologa pedidu dexisténsia keixa

Iha 16 Juñu 2023, Tribunál Judisiál Primeira Instánsia Suai prezide tentativa konsiliausaun ba krime danu simples ne'ebé envolve arguidu Alexandre Jose Gusmão hasoru lezadu Diogo Maio Gusmão, iha Munisípiu Covalima.

Akuzasaun Prokuradór

Prokuradór akuza katak iha 31 Outubru 2021, iha oras tuku 2:00 madrugada, arguidu ho nia maluk nain rua baku estraga lezadu nia motorizada nia espelu ho folin US\$6.00 ho lampu boot, folin US\$15.00 no kapasete ho folin US\$25.00. Konsekuensia husi arguidu ninia hahalok lezadu hetan prejuizu US\$ 71.00.

Prokuradór akuza arguidu kontra artigu 258 KP kona-ba danu simples ho moldura penál tinan 3 ka multa.

Produsaun ba prova sira

Bazeia ba artigu 262 (1) KPP kona-ba tentativa ba konsiliausaun, nune'e antes tama ba

judgamentu ba prova sira juis husu atu halo tentativa konsiliaun ba arguidu no lezada.

Iha prosesu tentativa konsiliaun ne'e, parte sira hakarak dame malu sen kondisaun ruma tanba antes ne'e sira dame malu ona.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame no pedidu dezistencia keixa ne'e, nune'e tuir artigu 262 (2) tribunál konklui prosesu ne'e no omolga pedidu dezistencia keixa ne'e.

7. Krime ofensa ba integridade fízika simples ho natureza violénsia doméstika

Nú. Prosesu : 0024/23.BBMLV
Kompozisaun Tribunál : Singulár
Juis : Dra. Patricia de Araújo F. B. M Xavier
Prokuradór : Dr. Nelson J. S Magno
Defeza : Dr. Jonas Henrique da Costa
Desizaun : Pena prizaun tinan 1 fulan 6 suspende ba tinan 1 fulan 6

Iha 16 Juñu 2023, Tribunál Judisiál Primeira Instánsia Suai liuhusi julgamentu movel iha Munisípiu Bobonaro prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu CS hasoru nia feen ho nia oan fetu, iha Munisípiu Bobonaro.

Akuzasaun prokuradór

Prokuradór akuza katak iha 1 Marsu 2023, iha oras tuku 21:00 kalan, arguidu tuku dala haat iha lezada nia kotuk laran, tebe dala haat iha lezada nia knosen rezulta lezada monu ba rai no arguidu kontinua tebe iha lezada nia kotuk laran rezulta moras halo lezada hakilar maka'as, nune'e lezada nia oan fetu LVM hakilar ba arguidu labele baku kolia didiak deit, nune'e arguidu nervoju tebe dala ida iha lezada nia oan fetu LVM nia liman sikun perte loos no kontinua tebe dala ida iha lezada nia knosen.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal to'o tinan 3 ka multa konjuga ho artigu 2, 3(a, C), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak arrepende nia hahalok no promete sei la komete tan krime hanesan iha futuru no foin primeiravés mai hatan iha tribunál.

Prokuradór husu ba tribunál atu presinde lezada sira nia deklarasaun no husi parte defeza laiha opsau seluk. Tanba ne'e, tribunál bazeia ba pedidu ne'e no presinde lezada

sira nia deklarasaun tanba iha produsaun ba prova arguidu konfesa integralmente ba faktu hotu iha akuzasaun.

Alegasaun finál

Prokuradór, haktuir katak arguidu provadu komete krime hasoru lezada sira tuir faktu sira iha akuzasaun, prokuradór haree katak krime violénsia doméstika aas tebes nune'e atu halo prevensaun ba krime refere, husu ba tribunál atu kondena arguidu pena prizaun no suspende ninia ezekusaun.

Entretantu, defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, arrepende nia hahalok no promete sei la repete hahalok hanesan iha futuro.

Desizaun

Depoizde avalia faktu sira hotu, tribunál prova katak arguidu tuku dala haat iha lezada nia kotuk laran, tebe dala haat iha lezada nia knosen rezulta lezada monu ba rai no arguidu kontinua tebe iha lezada nia kotuk laran rezulta moras halo lezada hakilar maka'as, nune'e lezada nia oan feto LVM hakilar ba arguidu labele baku kolia didiak deit, nune'e arguidu nervoju tebe dala ida iha lezada nia oan feto LVM nia liman sikun perte loos no kontinua tebe dala ida iha lezada nia knosen.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no promete sei la komete tan krime hanesan iha futuro, nune'e tribunál konklui prosesu ne'e no kondena arguidu ba kada krime ho pena prizaun tinan ida no pena úniku pena prizaun tinan ida fulan neen suspende ba tinan ida fulan neen.

8. Krime ofensa ba integridade física simples ho natureza violénsia doméstika

Nú. Prosesu	: 0027/23.BBMLV
Kompozisaun Tribunál	: Singulár
Juis	: Dra. Patricia de Araújo F. B. M Xavier
Prokuradór	: Dr. Nelson J. S Magno
Defeza	: Dr. Jonas Henrique da Costa
Desizaun	: Pena prizaun fulan 3 suspende ba tinan 1

Iha 16 Juñu 2023, Tribunál Judisiál Primeira Instánsia Suai liuhusi julgamentu movel iha Munisípiu Bobonaro prezide leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AR hasoru nia feen, iha Munisípiu Bobonaro.

Akuzasaun prokuradór

Prokuradór akuza katak iha 12 Marsu 2023, iha oras tuku 18:30 kalan, arguidu tuku dala ida iha lezada nia ibun, tuku dala tolu iha lezada nia ulun parte loos rezulta moras iha ibun no ulun parte loos.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal to'o tinan 3 ka multa konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu iha akuzasaun, arguidu deklara katak nia la tuku lezada nia ibun maibé sira hadau malu pasta maka halo lezada nia ulun kona iha kama leten. Depois akontesementu ne'e sira di'ak malu fali no kontinua moris hamutuk hanesan feen ho la'en.

Iha parte seluk lezada kontinua konfirma faktu hotu iha akuzasaun no deklara katak depoisde akontesementu ne'e liu loron rua foin diak malu fali ho arguidu.

Alegasaun finál

Prokuradór konsidera arguidu provadu komete krime hasoru lezada, mezmú arguidu koko atu nega faktu balun iha akuzasaun, maibé lezada konfirma no prokuradór haree katak krime violénsia doméstika aas tebes nune'e atu halo prevensaun ba krime refere, husu ba tribunál atu kondena arguidu ho pena prizaun suspende ninia ezelesaun.

Entretantu, defeza haktuir katak arguidu deklara deit faktu ne'ebé nia komete, tanba ne'e husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu sira hotu, tribunál prova katak arguidu tuku dala ida iha lezada nia ibun, tuku dala tolu iha lezada nia ulun parte loos rezulta moras iha ibun no ulun parte loos. Bazeia ba faktu provadu sira ne'e, tribunál konklui prosesu ne'e no kondena arguidu ho pena prizaun fulan tolu suspende ba tinan ida.

9. Krime ofensa ba integridade fízika simples ho natureza violénsia doméstika

Nú. Prosesu	: 0065/20.BBMLV
Kompozisaun Tribunál	: Singulár
Juis	: Dra. Patricia de Araújo F. B. M Xavier
Prokuradór	: Dr. Nelson J. S Magno
Defeza	: Dr. Jonas Henrique da Costa
Desizaun	: Pena prizaun fulan 6 suspende ba tinan 1

Iha 16 Juñu 2023, Tribunál Judisiál Primeira Instánsia Suai liuhusi julgamentu movel iha Munisípiu Bobonaro prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguida BP hasoru nia oan, iha Munisípiu Bobonaro.

Akuzasaun prokuradór

Prokuradór akuza katak iha 18 Abril 2020, iha oras tuku 13:00 meiodia, arguida hanesan lezada nia inan, lezada ho nia maun deskute malu, nune'e arguida sai ba branda lori kedas ai-sar baku dala ida iha lezada nia kidan parte karuk kontinua baku dala rua iha

lezada nia kidan parte karuk no lori ai-manas fakar iha lezada nia isin loloon, rezulta lezada nia isin loloon mean no manas.

Prokuradór akuza arguidu kontra artigu 145 KP kona-ba ofensa integridade fízika simples ho moldura penal to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguida konfesa faktu sira iha akuzasaun no deklarara katak arrepende ona nia hahalok no promete sei la komete tan krime hanesan iha futuru no foin primeiravés mai hatan iha tribunál.

Depoisde rona deklarasaun arguida nian, prokuradór husu ba tribunál atu presinde deklarasaun husi lezada, tanba arguida konfesa faktu integralmente. Kona-ba pedidu ne'e, defeza laiha opozisaun. Tribunál bazeia ba pedidu refere, presinde audisaun ba lezada nia deklarasaun.

Alegasaun finál

Prokuradór, haktuir katak arguidu provadu komete krime tuir faktu sira iha akuzasaun, prokuradór haree katak krime violénsia doméstika aas tebes nune'e atu halo prevensaun ba krime refere, husu ba tribunál atu kondena arguidu ho pena prizaun suspende ninia ezekusaun.

Entretantu, defeza haktuir katak arguidu konfesa, arrepende ona nia hahalok no depoisde akontesimentu ne'e arguidu la komete ona krime seluk hasoru lezada. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu sira hotu, tribunál prova katak arguida lori ai-sar baku dala ida iha lezada nia kidan parte karuk kontinua baku dala rua iha lezada nia kidan parte karuk no lori ai-manas fakar iha lezada nia isin loloon, rezulta lezada nia isin loloon mean no manas.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguida ho pena prizaun fulan neen suspende ba tinan ida.

10. Krime ofensa ba integridade fízika simples ho natureza violénsia doméstik

Nú. Prosesu	: 0005/21.BBBGD
Kompozisaun Tribunál	: Singulár
Juis	: Dra. Patricia de Araújo F. B. M Xavier
Prokuradór	: Dr. Nelson J. S Magno
Defeza	: Dr. Jonas Henrique da Costa
Desizaun	: Pena prizaun fulan 3 suspende ba tinan 1

Iha 16 Juñu 2023, Tribunál Judisiál Primeira Instánsia Suai liuhusi julgamentu movel iha Munisípiu Bobonaro prezide leitura sentensa ba krime ofensa ba integridade fízika

simples ho natureza violénsia doméstika ne'ebé envolve arguidu NP hasoru nia oan CL, iha Munisípiu Bobonaro.

Akuzasaun prokuradór

Prokuradór akuza katak iha data ne'ebé la apura maibé iha Jullu 2021, iha oras tuku 7:00 dadeer, arguidu deskonfia lezada iha amante ho mane seluk. Arguidu tama tuir lezada ne'ebé sudi hela ahi, arguidu husu ba lezada nune'e "*ohin ó sai ba ne'e ho alin mane ba ne'ebé,*" lezada hatan katak hau la ba fatin ruma. Arguidu lori katana taa ai-rin dapur nian, arguidu rai katana tun ba rai, no kontinua tebe dala ida iha lezada nia kidun no tuku dala ida iha lezada nia kanuruk no lezada nia ulun kona iha batar ne'ebé tara hela, la to'o iha ne'e de'it arguidu kontinua buti iha lezada nia kakorok no arguidu nia liman kukun kona lezada nia kakorok to'o nakles

Prokuradór akuza arguidu kontra artigu 145 KP kona-ba ofensa integridade fízika simples ho moldura penal to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu nega faktu iha akuzasaun no deklara katak nia la tebe no tuku iha lezada nia kanuruk, loos duni nia kaer katana ta ai-rin dapur ne'e atu ameasa deit lezada, la kaer lezada nia fuuk hodi dudu ba iha batar, la buti lezada nia kakorok, maibé lezada nia liman kukun maka kona nia kakorok rezulta nakles.

Iha parte seluk lezada kontinua konfirma faktu hotu iha akuzasaan no deklara katak, faktu iha akuzasaun ne'e loos hotu, arguidu sempre baku nia hela deit tanba deskonfia lezada iha amante ho mane seluk no depoisde akontesementu ne'e sira di'ak malu ona.

Alegasaun finál

Prokuradór husu ba tribunál atu kondena arguida ho pena prizaun suspende ninia ezekusaun, mezmu iha deklarasaun arguidu nega faktu balu iha akuzasaun maibé iha relatóriu médiku ne'ebé hatudu katak lezada hetan duni agresaun fízika husi arguidu no lezada mós konfirma faktu hotu iha akuzasaun.

Entretantu, defeza iha nia alegasaun haktuir katak iha perante julgamentu arguidu deklara faktu hotu iha akuzasaan ne'e laloos nia la baku lezada ida. Mezmu nune'e lezada konfirma faktu hotu iha akuzasaan, lezada mós deklara katak, depoisde akontesementu ne'e sira diak malu ona. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu sira hotu, tribunál prova katak arguidu lori katana taa ai-rin dapur nian, arguidu rai katana tun ba rai, no kontinua tebe dala ida iha lezada nia kidun no tuku dala ida iha lezada nia kanuruk no lezada nia ulun kona iha batar ne'ebé tara hela, la to'o iha ne'e de'it arguidu kontinua buti iha lezada nia kakorok no arguidu nia liman kukun kona lezada nia kakorok to'o nakles.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguida ho pena prizaun fulan tolu suspende ba tinan ida.

11. Krime ofensa ba integridade fízika simples ho natureza violénsia domestika

Nú. Prosesu	: 0027/23.BBMLV
Kompozisaun Tribunál	: Singulár
Juis	: Dra. Patricia de Araújo F. B. M Xavier
Prokuradór	: Dr. Nelson J. S Magno
Defeza	: Dr. Jonas Henrique da Costa
Desizaun	: Pena multa US\$45.00

Iha 16 Juñu 2023, Tribunál Judisiál Primeira Instánsia Suai liu husi julgamentu movel prezide julgamentu no emediata le leitura sentens ba krime ofensa ba integridade fízika simples ho natureza violénsia doméstika ne'ebé envolve arguidu JdC hasoru nia feen, iha Munisípiu Bobonaro.

Akuzasaun prokuradór

Prokuradór akuza katak iha 12 Marsu 2023, iha oras tuku 18:30 kalan, arguidu tuku dala ida iha lezada niaibun, kontinua tuku tan dala tolu iha lezada nia ulun parte loos. Rezulta lezada niaibun hetan kanek no ulun hetan moras no bubu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa parsialmente ba faktu sira iha akuzasaun no deklara katak la tuku maibé basa deit iha lezada niaibun no basa dala rua iha lezada nia hasan no arguidu tuku duni lezada, maibé kona deit iha kapaseti. Arguidu deklara mós katak moris separa ona ho lezada, arrepende nia hahalok no promete sei la komete tan krime hanesan iha futuru no foin primeiravés mai hatan iha tribunál.

Entretantu lezada kontinua konfirma faktu hotu iha akuzasaun no deklara katak, arguidu deklara deit faktu ne'ebé nia komete, arrepende nia hahalok, foin primeiravés mai hatan iha tribunál no promete sei la komete tan krime hanesan iha futuru.

Alegasaun finál

Prokuradór haktuir katak arguidu provadu komete krime sira tuir faktu sira iha akuzasaun, haree katak krime violénsia doméstika aas tebes nune'e atu halo prevensaun ba krime refere, husu ba tribunál atu kondena arguidu ho pena prizaun suspende ninia ezekusaun.

Entretantu, defeza iha nia alegasaun haktuir katak iha julgamentu arguidu konfesa parsialmente, arrepende ona nia hahalok no depoisde akontesimentu ne'e arguidu la komete ona krime seluk hasoru lezada. Tanba ne'e husu ba tribunál atu aplika pena multa.

Desizaun

Depoisde avalia faktu sira hotu, tribunál prova katak, arguidu foti ai baku lezada nia ulun la konsege kona lezada sata netik ho liman, rezulta lezada nia liman bubu no mean.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena multa US\$45.00 ne'ebé kada loron arguidu sei selu 0.50 sentavus durante loron 90. Tribunál mós fíkxa pena alternativa durante loron 60 prizaun, bainhira arguidu la kumpri pena multa refere.

12. Krime ofensa ba integridade fízika simples ho natureza violénsia doméstika

Nú. Prosesu	: 0011/22.BBBLB
Kompozisaun Tribunál	: Singulár
Juis	: Dra. Patricia de Araújo F. B. M Xavier
Prokuradór	: Dr. Nelson J. S Magno
Defeza	: Dr. Jonas Henrique da Costa
Desizaun	: Pena prizaun fulan 8 suspende ba tinan 1 fulan 6

Iha 16 Juñu 2023, Tribunál Judisiál Primeira Instánsia Suai liuhusi julgamentu movel iha Munisípiu Bobonaro prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu FK hasoru nia feen, iha Munisípiu Bobonaro.

Akuzasaun prokuradór

Prokuradór akuza katak iha loron no fulan ne'ebé la apura maibé iha tinan 2022, arguidu basa dala ida iha lezada nia ulun parte karuk, kontinua rasta lezada nia liman tama ba uma laran rezulta lezada nia liman bubu no metan.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penal to'o tinan 3 ka multa, konjuga ho artigu 2, 3(a) 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklarata katak arrepende nia hahalok no promete sei la komete tan krime hanesan iha futuru no foin primeiravés mai hatan iha tribunál.

Depoisde rona deklarasaun arguidu nian, prokuradór husu ba tribunál atu presinde deklarasaun husi lezada, tanba arguidu konfesa faktu integralmente. Kona-ba pedidu ne'e, defeza laiha opozisaun. Tribunál bazeia ba pedidu refere, presinde audisaun ba lezadu nia deklarasaun.

Alegasaun finál

Prokuradór, haktuir katak arguidu provadu komete krime tuir faktu sira iha akuzasaun, prokuradór haree katak krime violénsia doméstika aas tebes nune'e atu halo prevensaun ba krime refere, husu ba tribunál atu kondena arguidu ho pena prizaun suspende ninia ezekusaun.

Entretantu, defeza iha nia alegasaun haktuir katak iha perante julgamentu arguidu konfesa, arrepende ona ninia hahalok no depoisde akontesimentu ne'e arguidu la komete ona krime seluk hasoru lezada. Tanba ne'e husu ba tribunál atu aplika pena ne'ebé kmaan ba arguidu.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia ulun parte karuk, kontinua rasta lezada nia liman tama ba uma laran rezulta lezada nia liman bubu no metan.

Bazeia ba faktu provadu sira ne'e no tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu ne'e no kondena arguidu ho pena prizaun fulan ualu suspende ba tinan ida fulan neen.

13. Krime tentativa violasaun seksuál

Nú. Prosesu	: 0008/21.ANHTU
Kompozisaun Tribunál	: Koletivu
Juis	: Dra. Patricia de Araujo F. B. M. Xavier, Dr. Naason Mário Armindo Marques Doutel no Dr. Samuel da Costa Pacheco
Prokuradór	: Dr. Rafael Jeronimo Gusmão
Defeza	: Dr. Jonas Henrique da Costa
Desizaun	: Absolve

Iha 21 Juñu 2023, Tribunál Judisiál Primeira Instánsia Suai prezide leitura akordaun ba krime tentativa violasaun seksuál ne'ebé envolve arguidu DXL hasoru lezada, iha Munisípiu Ainaro.

Akuzasaun prokuradór

Prokuradór akuza katak iha 23 Jullu 2021, iha oras tuku 18:18 kalan, lezada husu ajuda ba arguidu ho konesimentu arguidu nia feen ho objektivu atu tula lezada ho motorizada

fila ba uma no arguidu ajuda tula lezada ho motorizada marka revo, maibé to'o iha dalan klaran iha estrada boot, arguidu komesa haruka lezada atu hakuak arguidu, maibé lezada lakohi, arguidu obriga dada lezada nia liman karuk hodi hatama ba kalsa laran no haruka lezada kaer arguidu nia orgaun sensitivu hodi doko iha motor leten. Tanba lezada sente tauk lezada halo tuir de'it arguidu nia hakarak no lao nafatin no arguidu kondus motor halai tama fali ba dalan ba toos nian ho distansia kuaze metro 20 hosi estrada públiku, arguidu para tiha motor no haruka lezada tun husi motor leten, hafoin arguidu hatun nia kalsa hodi haruka lezada kaer nia orgaun sensitivu hodi doko, alende ne'e arguidu komesa rein lezada nia orgaun sensitivu no tenta atu hasai lezada nia kalsa, arguidu nia asaun ne'e lezada tenta atu ses husi arguidu, maibé arguidu kontinua loke lezada nia faru hodi kaer lezada orgaun sensitivu no arguidu nafatin hakuak metin lezada no derepente lezada dehan ema mai ne'eba ne'e, nune'e arguidu foin husik lezada. Tuir mai lezada husu tulun atu prezenta keixa iha Polisia.

Prokuradór akuza arguidu kontra artigu 23, 24 no 172 KP kona-ba tentativa violasaun seksuál ho moldura penál tinan 5 too tinan 15.

Produsaun ba prova sira

Iha julgamentu, arguidu konfesa faktu hotu iha akuzasaun no deklarata katak antes ne'e arguidu ho lezada iha relasaun namoru no iha akontesimentu ne'e arguidu la obriga lezada tanba hakarak ho hakarak. Arguidu deklarata liután katak lezada ba keixa arguidu tanba ema kaer toman nune'e lezada ba kesar.

Alende ne'e lezada kontinua konfirma faktu hotu iha akuzasaun no deklarata katak lezada mós hakarak.

Alegasaun finál

Prokuradór haktuir katak, husu ba tribunál atu halo alterasaun kualifikasaun krime ne'e ba fali koasaun seksuál, tanba iha julgamentu arguidu deklarata katak kaer duni lezada nia orgaun sensitivu sira, tanba ne'e husu ba tribunál atu kondena arguidu tuir artigu 171 KP.

Enkuantu defeza haktuir katak, arguidu ninia aktu ne'e la priense krime ne'ebé akuza ba arguidu, tanba iha julgamentu lezada deklarata katak aktu ne'e akontese tanba lezada mós hakarak no antes ne'e arguidu ho lezada iha relasaun namoru,

Desizaun

Depoisde avalia faktu sira, tribunál konsidera faktu hotu la provadu, tanba aktu ne'e akontese tanba hakarak ho hakarak, nune'e tribunál konsidera arguidu nia aktu ne'e la priense elementu husi krime ne'ebé akuza ba arguidu, nune'e tribunál la konkorda ho pedidu alterasaun husi prokuradór. Bazeia ba faktu la provadu sira ne'e tribunál konklui prosesu ne'e no absolve arguidu husi krime ne'e.

14. Krime ofensa ba integridade física simples ho natureza violência doméstica

Nú.Prosesu : 0007/23.MFALS
KompozisaunTribunál : Singulár
Juis : Dr. Samuel da Costa Pacheco

Prokuradór : Dr. Rafael Jeronimo Gusmão
Defeza : Dr. Jonas Henrique da Costa
Desizaun : Pena prizaun fulan 6 suspende ba tinan 1

Iha 23 Juñu 2023, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples ho natureza VD ne'ebé envolve arguidu AF hasoru nia feen, iha Munisípiu Covalima.

Akuzasaun prokuradór

Prokuradór akuza katak iha 3 Janeiru 2023, iha oras tuku 10:00 dadeer, arguidu kaer lezada nia liman rasta rezulta lezada monu ba rai kauza lezada nia ain-tuur hetan kanek. Antes agresaun ne'e, arguidu ho lezada diskute malu kona-ba motivu ne'ebé mak la klaru, ho nune'e mosu agresaun ne'e.

Tuir mai iha 3 Abril 2023, iha oras tuku 19:00 kalan, arguidu basa dala ida lezada nia ulun. Antes agresaun ne'e, arguidu ho lezada diskute malu kona-ba motivu ne'ebé mak la klaru, ho nune'e mosu agresaun ne'e. Arguidu nia aktu ne'e rezulta lezada sofre moras no kanek. Lezada konsege ba halo tratamentu saúde iha Sentru Saúde Fatuberliu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa konjuga ho artigu 2,3(a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarasaun diak malu ona ho lezada no promete sei la kometa tan krime hanesan iha futuru.

Prokuradór husu ba tribunál atu presinde lezada nia deklarasaun no husi parte defeza laiha opsau seluk. Tanba ne'e, tribunál bazeia ba pedidu ne'e no presinde lezada nia deklarasaun tanba iha produsaun ba prova lezada konfesa integralmente ba faktu hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, nune'e atu prevene krime ne'e akontese tan iha futuru, nune'e husu ba tribunál atu kondena arguidu ho pena ne'ebé adekuadu.

Alende ne'e defeza mós husu ba tribunál atu kondena arguidu ho pena ne'ebé adekuadu ho konsiderasaun katak arguidu konfesa, di'ak malu ona ho lezada no promete sei la komete tan krime hanesan iha futuru.

Desizaun.

Depoisde avalia faktu sira hotu, tribunál prova katak iha 3 Janeiru 2023, arguidu kaer lezada nia liman rasta rezulta lezada monu ba rai kauza lezada nia ain-tuur hetan kanek. Tribunál mós prova katak iha 3 Abril, 2023, arguidu basa dala ida lezada nia ulun.

Bazeia ba faktu provadu hirak ne'e no tetu mós ho sirkunstánsia atenuante sira hanesan arguidu konfesa, di'ak malu ona ho lezada no promete sei lakometa tan krime haneasan iha futuru, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

15. Krime ofensa ba integridade física simples ho natureza violência doméstica

Nú.Prosesu : 0012/21.BBLLT
KompozisaunTribunál : Singulár
Juis : Dr. Jose Maria de Araujo
Prokuradór : Dr. Nelson J.S Magno
Defeza : Dr. Domingos dos Santos
Ofisial Justisa : Sr. Januario de Araújo
Desizaun : Pena prizaun fulan 3 suspende ba tinan 1

Iha 28 Juñu 2023, Tribunál Judisiál Primeira Instánsia Suai prezide leitura sentensa ba krime ofensa ba integridade física simples ho natureza VD ne'ebé envolve arguidu DC hasoru nia feen, iha Munisípiu Bobonaro.

Akuzasaun prokuradór

Prokuradór akuza katak iha 22 Outubru 2021, iha oras tuku 03:00 madrugada, arguidu tuku dala ida iha lezada nia hasan parte karuk. Antes agresaun ne'e, arguidu ho lezada diskute malu kona-ba, arguidu husu ba lezada atu halo relasaun seksuál maibé lezada lakohi, tanba antes ne'e halo ona relasaun seksuál ho arguidu, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál too tinan 3 ka multa konjuga ho artigu 2, 3 (a), 35(b) LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarara katak di'ak malu ona, arrepende ona nia hahalok no promete sei larepete tan krime hanesan hasoru lezada ka ema seluk iha futuru.

Prokuradór husu ba tribunál atu presinde lezada nia deklarasaun no husi parte defeza laiha opsaun seluk. Tanba ne'e, tribunál bazeia ba pedidu ne'e no presinde lezada nia deklarasaun tanba iha produsaun ba prova arguidu konfesa integralmente ba faktu hotu iha akuzasaun.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian, mezmu sira di'ak malu ona maibé haree ba krime violência doméstica ne'ebé aas tebes, nune'e atu halo prevensaun ba krime refere husu ba tribunál atu aplika pena prizaun fulan 6 suspende ba tinan 1.

Enkuantu defeza haktuir katak arguidu konfesa, di'ak malu ona ho lezada no too agora la komete tan krime seluk, tanba ne'e husu ba tribunál atu kondena arguidu ho pena multa tuir arguidu nia kbiit.

Desizaun

Depoisde avalia faktu hotu, tribunál prova katak arguidu tuku dala ida iha lezada nia hasan parte karuk. Bazeia ba faktu provadu hirak ne'e no tetu mós ho sirkunstánsia atenuante no agravante ne'ebé haleu krime ne'e, nune'e tribunál konklui prosesu no kondena arguidu ho pena prizaun fulan neen suspende ba tinan ida.

16. Krime ofensa ba integridade fízika simples ho natureza violénsia doméstika

Nú.Prosesu : 0007/22.BBMLV
KompozisaunTribunál : Singulár
Juis : Dr. Samuel da Costa Pacheco
Prokuradór : Dr. Nelson J.S Magno
Defeza : Dr. Domingos dos Santos
Desizaun : Pena prizaun fulan 3 suspende ba tinan 1

Iha 28 Juñu 2023, Tribunál Judisiál Primeira Instánsia Suai prezide leitura sentensa ba krime ofensa ba integridade fízika simples natureza VD ne'ebé envolve arguidu EP hasoru nia feen, iha Munisípiu Bobonaro.

Akuzasaun Prokuradór

Prokuradór akuza katak iha 30 Janeiro 2022, iha oras tuku 14.00, lokraik, arguidu lori kadeira plastiktu tuda ba lezada nia ulun, rasta lezada nia fuuk no dada lezada ba iha baki rezulta lezada nia ain-tuur parte loos kanek, tuku dala rua iha lezada nia kotuk laran, tuku dala ida iha lezada nia kanuruk no rakut lezada nia kabaas parte loos no parte karuk ruzulta moras no kanek. Antes agresaun ne'e, arguidu ho lezada diskute malu kona-ba arguidu atu ba hemu tua maibé lezada lakohi no foti tiha tua sabu iha arguidu nia oin no hadau kaneka ne'ebé tua iha laran hela rezulta tua fakar, ho nune'e arguidu dehan ba lezada katak "*hau la gosta ema fakar tua iha hau nia oin,*" arguidu nia inan halai ba tiha nia oan fetu sira, nune'e arguidu hatete ba lezada atu bolu fali arguidu nia inan mai uma, maibé lezada lakohi nune'e arguidu komete krime refere hasoru lezada. Aktu ne'e rezulta lezada sofre moras no kazu ne'e aneksa mós ho relatóriu médiku husi Óspital Referral Maliana.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa konjuga ho artigu 2, 3 (a), 35 (b) no 36 LKVD.

Produsaun ba prova sira

Iha julgamentu, arguidu konfesa integralmente ba faktu sira iha akuzasaun no deklarata katak arrepende ona nia hahalok, foin primeiravés mai hatan iha tribunál no promete sei larepete tan krime hanesan iha futuro, arguidu deklarata liután katak depoisde akontesimentu too agora arguidu labaku ona lezada.

Prokuradór husu ba tribunál atu presinde lezada nia deklarasaun no husi parte defeza laiha opsaun seluk. Tanba ne'e, tribunál bazeia ba pedidu ne'e no presinde lezada nia deklarasaun tanba iha produsaun ba prova arguidu konfesa integralmente ba faktu hotu iha akuzasaun.

Alegasaun finál

Prokuradór haktuir katak arguidu provadu komete krime hasoru lezada bazeia ba konfisaun arguidu nian, nune'e atu prevene krime ne'e akontese tan iha futuro husu ba tribunál atu kondena arguidu tuir artigu 145 KP.

Entretantu defeza husu ba tribunál atu kondena arguidu ho pena ne'ebé justu no adekuaudu ho konsiderasaun katak arguidu konfesa, arrepende nia hahalok no foin primeiravés mai hatan iha tribunál.

Desizaun

Depoisde avalia faktu sira hotu tribunál prova katak arguidu lori kadeira plastiku tuda ba lezada nia ulun, rasta lezada nia fuuk no dada lezada ba iha baki rezulta lezada nia aintuur parte loos kanek, tuku dala rua iha lezada nia kotuk laran, tuku dala ida iha lezada nia kanuruk no rakut lezada nia kabaas parte loos no parte karuk ruzulta moras no kanek.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende nia hahalok no foin primeiravés mai hatan iha tribunál, nune'e tribunál konklui prosesu no kondena arguidu ho pena prizaun fulan tolu suspende ba tinan ida.

17. Krime omisídiu negligente

Nú.Prosesu : 0002/21.MFSTR
KompozisaunTribunál : Singulár
Juis : Dr. Jose Maria de Araujo
Prokuradór : Dr. Rafael Jeronimo Gusmão
Defeza : Dr. Domingos dos Santos
Desizaun : Pena prizaun tinan 1 fulan 6 suspende ba tinan 1 fulan 6
no kustu judisiál US\$25.00

Iha 28 Juñu 2023, Tribunál Judisiál Primeira Instánsia Suai prezide leitura sentensa ba krime omisídiu negligente ne'ebé envolve arguidu Justino Mali Mauc da Costa Tilman hasoru lezadu Moises Cardoso, iha Munisípiu Manufahi.

Akuzasaun Prokuradór

Prokuradór akuza katak iha 03 Outubru 2021, iha oras 17:20 lokraik, arguidu konduz motorizada ho marka Jupiter MX kor metan ho sapa matrikula C. 3480 TL, halo viagem iha área Rai-ubu ba Nularan-Same, arguidu tula ho nia alin atu ba asiste jogu futebol iha kampu, maibé bainhira jogu remata arguidu ho nia alin atu fila ba nia uma maizumenus husi kampu futebol ba iha fatin akontesementu 200 metrus hanesan ne'e arguidu atu ultrapasa oin maibé lakonsege kontrola nune'e soke lezadu ne'ebé la'o ain iha estrada parte karuk ninin no lezadu nia kanuruk baku ba estrada rezulta kanek no bubu, lezadu

latan iha estrada la book-an, raan sai husi inus no sai husi tilun sorin loos. Arguidu konduz motorizada ho velocidade maka'as bainhira hakarak ultrapasa motorizada sira iha oin, nune'e arguidu lakonsege tama fali ba nia dalan ho loloos ba liman karuk nune'e lakon nia kontrolu no hodi soke lezadu. Konsekuensia husi asidente ne'e lezadu mate iha ospital tanba sofre pankada maka'as iha parte ulun no kanuruk.

Prokurador akuza arguidu kontra artigu 140 KP kona-ba krime omisidui negligente ho moldura penal too tinan 4 ka multa.

Produsaun ba prova sira

Iha julgamentu, arguidu konfesa faktu hotu iha akuzasaun no arguidu mos deklara katak fo ona osan ho montante US\$4,300.00 no karau tolu no karau tolu ne'e se faan karik sei hetan osan ho valor US\$1,500.00 ba lezadu nia familia ba seremonia funeral lezadu nian. Arguidu mos deklara katak serbisu hanesan mekanik motor ho vensimentu kada fulan sei hetan osan US\$100 too US\$200.

Alegasaun final

Prokurador konsidera arguidu provadu komete krime omisidui negligente hasoru lezada bazeia ba konfisaun arguidu nian, mezmu nune'e depoisde akontesementu ne'e arguidu fo ona osan ba lezadu ninia familia, nune'e husu ba tribunal atu kondena arguidu tuir artigu 140 KP.

Enkuantu defeza haktuir katak, iha julgamentu arguidu konfesa, foin mak mai hatan iha tribunal no arguidu mos kontribui ona osan ba lezadu nia funebre, bazeia ba sirkunstansia sira ne'e hotu husu ba tribunal atu kondena arguidu ho pena multa.

Desizaun

Depoisde avalia faktu hotu, tribunal prova katak arguidu provadu komete duni krime hasoru lezada. Bazeia ba faktu provadu sira ne'e no tetu mos ho sirkunstansia atenuante sira hanesan arguidu ho nia familia fo ona osan ba vitima nia funebre, nune'e tribunal konklui prosesu ne'e no kondena arguidu ho pena prizaun tinan ida fulan neen suspende ba tinan ida fulan neen no selu mos kustu judisial US\$ 25.00.

18. Krime ofensa ba integridade fizika simples ho natureza violensia domestika

Nu.Prosesu	: 0008/21.BBBLB
KompozisaunTribunal	: Singulár
Juis	: Dra. Patricia de Araujo F. B. M. Xavier
Prokurador	: Dr. Pascasio de Rosa
Defeza	: Dr. Domingos dos Santos
Desizaun	: Pena multa US\$30.00

Iha 30 Juñu 2023, Tribunal Judisial Primeira Instansia Suai liuhusi julgamentu movel iha munisipiu Bobonaro prezide leitura sentensa ba krime ofensa ba integridade fizika simples natureza VD ne'ebé envolve arguidu AB hasoru nia feen, iha Munisipiu Bobonaro.

Akuzasaun prokuradór

Prokuradór akuza katak iha 16 Agostu 2021, iha oras tuku 21:00 kalan, arguidu tuku dala ida iha lezada nia matan fukun parte karuk rezulta moras no bubu. Antes agresaun ne'e arguidu telefone ninia oan feto boot atu sosa arguidu nia telefone foun, lezada rona ida ne'e hadau tiha telefone husi arguidu no arguidu hadau fali telefone no halo agreasaun ne'e hasoru lezada.

Prokuradór akuza arguidu kontra artigu 145 KP kona-ba krime ofensa ba integridade física simples ho moldura penál too tinan 3 ka multa konjuga ho artigu 2,3(a), 35 (b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no arrepende nia hahalok, foin primeiravés mai hatan iha tribunál no promete sei larepete hahalok ne'e iha futuro.

Prokuradór husu ba tribunál atu presinde lezada nia deklarasaun no husi parte defeza laiha opsaun seluk. Tanba ne'e, tribunál bazeia ba pedidu ne'e no presinde lezada nia deklarasaun tanba iha produsaun ba prova arguidu konfesa integralmente ba faktu hotu iha akuzasaun.

Alegasaun finál

Prokuradór haktuir katak, arguidu provadu komete krime hasoru lezada bazeia ba konfisaun arguidu nian, nune'e husu ba tribunál atu kondena arguidu ho pena multa.

Entretantu defeza husu ba tribunál atu kondena arguidu ho pena ne'ebé adekua ho konsiderasaun, arguidu konfesa, arrepende nia hahalok, foin primeiravés mai hatan iha tribunál no promete sei la repete tan hahalok hanesan iha futuro.

Desizaun

Depoisde avalia faktu hotu, tribunál prova katak arguidu tuku dala ida iha lezada nia matan fukun parte karuk rezulta moras no bubu.

Bazeia ba faktu provadu hirak ne'e no tetu mós ho sirkunstánsia atenuante sira hanesan, nune'e tribunál konklui prosesu no kondena arguidu ho pena multa US\$ 30.00 lora ida arguidu sei selu Sentavus 0,50 durante lora 60, tribunál mós fiksa pena alternativa lora 40.

19. Krime ofensa ba integridade física simples ho natureza violénsia doméstika

Nú.Prosesu	: 0008/21.BBBLB
KompozisaunTribunál	: Singulár
Juis	: Dra. Patricia de Araujo F. B. M. Xavier
Prokuradór	: Dr. Pascasio de Rosa Alves
Defeza	: Dr. Domingos dos Santos

Desizaun : Pena prizaun fulan 4 suspende tinan 1 selu kustu judisial
US\$ 25.00

Iha 30 Juñu 2023, Tribunál Judisiál Primeira Instánsia Suai liuhusi julgamentu movel iha Munisípiu Bobonaro prezide leitura sentensa ba krime ofensa ba integridade fízika simples ho natureza VD ne'ebé envolve arguidu JA hasoru nia feen, iha Munisípiu Bobonaro.

Akuzasaun prokuradór

Prokuradór akuza katak iha 10 Abril 2023, iha oras tuku 9:00 dadeer, arguidu tuku dala barak iha lezada nia oin, buti lezada nia kakorok, tuku dala ida iha lezada nia ulun no foti sinelus baku dala barak iha lezada nia matan parte karuk. Antes agresaun ne'e, arguidu ho lezada diskute malu kona-ba lezada moras no toba hela, bainhira arguidu fila husi serbisu lezada haruka arguidu atu ba sosa aimoruk atu lezada hemu, maibé arguidu lakohi no ba loke fali radio halo lian boot no lezada ba taka tiha radio refere, ho nune'e mosu agresaun ne'e.

Prokurdadór akuza arguidu kontra artigu 145 KP kona-ba krime ofensa ba integridade fízika simples ho moldura penál too tinan 3 ka multa konjuga ho artigu 2,3(a), 35 (b) no 36 LKVD.

Produsaun ba prova sira

Iha prosesu julgamentu, arguidu hili direitu nonook, enkuantu lezada kontinua konfirma faktu hotu iha akuzasaun no deklarata katak deposite akontese fila ba uma di'ak malu kedas no too agora arguidu labaku ona lezada.

Alegasaun finál

Prokuradór haktuir katak, husu ba tribunál atu kondena arguidu ho regirozu oituan tanba arguidu nia hahalok ne'e grave tebes, arguidu hatene katak ninia feen moras no haruka atu ba sosa aimoruk maibé arguidu lakohi no ba loke fali radio halo lian boot.

Enkuantu, defeza husu ba tribunál atu aplika pena suspensaun ne'ebé kmaan ba arguidu.

Desizaun

Deposide avalia faktu sira hotu, tribunál prova katak arguidu nia aktu sira ne'e provadu bazeia ba konfirmasaun lezada nian. Bazeia ba faktu provadu sira ne'e tetu mós ho sirkunstánsia hotu-hotu ne'ebé haleu krime ne'e, nune'e tribunál konklui prosesu no kondena arguidu ho pena prizaun fulan haat suspende ba tinan ida no selu mós kustu judisiál US\$25.00.

Atu hetan informasaun liutan favór kontaktu:

Ana Paula Marçal

Diretora Ezekutiva JSMP

Telefone: 3323883/77040735

Diresaun e-mail: ana@jsmp.tl

info@jsmp.tl

Website: <http://jsmp.tl>